

畿輔河道 水利叢書

畿輔河道水利叢書序

良史古推馬班史記有河渠書河謂河道渠謂水利而班掾乃以溝洫志繼之歷叙漢代二百年中河流變遷此豈溝洫名篇之所能盡括蓋不惟水官失職而水學之放廢亦可見

本朝定制於經流則設總河及河道以司修防而塘堰圩圍則府州縣佐皆兼水利之衡以董之

世宗憲皇帝時因興修直隸水田特設營田水利府並設觀察副使諸官各揚其職觀建官之制而斯事

序

各爲一局也審余嘗觀史傳於疏濬蓄洩之事輒反復之見後人所用之法多前賢已用者後不嫌於襲前者以水性終古不易其不效者特用之不當耳然非留心採輯廣識而備記之則亦不能相度機宜施之臨事傳曰不習爲吏視已成事凡事皆然行水亦其一也竊欲分水學爲二如防江之堽禦海之塘黃河之隄埽及他廣川洪流之分合通塞曰河道直隸之淀泊丹陽之圩圍吳越之澮港關中六輔龍骨陳穎鴻郤鉗盧其設閘建壩撩

淺留泥諸法曰水利各採取專門諸書以附之庶成規犂然往復講習可資世用以合於湖州學治事齋之遺法今姑於梓里先之直隸志乘之外無專誌河道之書近有衰集成編者則考證爲多於疏濬無涉惟陳學士河渠志略於道古而詳於切今雖歲月變遷未必可盡見諸施行而利病所關指陳剴切前已刻於

畿輔通志中

欽定四庫書亦採入又其集內因事陳辭更能獨達所見

序

二

刻直隸河渠志一卷陳學士文鈔一卷明徐尙寶潞水客談實心探討於去位時書此持贈後人怡賢親王奉

命總理水利時以其言爲信而有徵京東一局取爲藍本其疏陳諸局形勢則有爲尙寶所不及者刻潞水客談一卷怡賢親王疏鈔一卷維時興修水田六七千頃水力贏縮無常當時已有改爲旱田者遺跡漸湮恐難訪求以施工作纂刻營田水利圖說一卷直隸水田自宋迄明歷經修治雖未能觀成

而良法具在散見史冊說部彙刻爲

畿輔水利輯覽一卷明左忠毅公屯田疏及

本朝水利案內皆有召募農師之語浸種插秧諸農書具載其法加意講求可爲樹藝灌溉之助因詳採諸農書刻澤農要錄六卷現在河道浞汭諸多淤塞以致水潦爲災上煩

宸厪謹擬爲

畿輔水道管見暨水利營田私議亦附刻焉顏曰

畿輔河道水利叢書并期訪諸鄉郡藏書家如有先

序

三

輩遺編談斯事者及留心水學之耆宿片羽碎金皆當續入漢時言治河者以百數桓譚典其議言凡此數者必有一是宜詳考驗皆可豫見計定然後舉事可以上繼禹功下除民疾區區竊取此意冀於當事者少効芻蕘則茲刻不爲虛矣是爲序道光四年歲在甲申余月益津吳邦慶撰

畿輔河道叢書目

直隸河渠志

陳學士文鈔

潞水客談

怡賢親王疏鈔

水利營田圖說

直隸水利輯覽

澤農要錄

直隸水道管見

畿輔河道叢書目

直隸水利私議

直隸河渠志

提要

謹案直隸河渠志一卷

國朝陳儀撰儀字子翹號一吾文安人康熙乙未進士官至翰林院侍講學士充霸州等處營田觀察使是編卽其經理營田時所作凡海河衛河白河淀河東淀永定河清河會同河中亭河西淀趙北口子牙河千里長隄滹沱河滏河寧晉泊還鄉河場河淀七里海二十餘水皆洪流巨浸雖叙述頗簡質所載但及當時形勢而不詳古蹟又數十年來屢蒙我

直隸河渠志

皇上軫念民依經營疏濬悉慶安瀾較儀作書之日水道之通塞分合又已小殊然儀本土人又身預水利之事于一切水性地形知之頗悉故敷陳利病之議多而考證沿革之文少錄而存之亦足以參稽梗槩也

直隸河渠志

翰林院侍讀學士陳儀撰

尙書禹貢一篇紀夏后行水之功司馬遷因之爲
河渠書班固繼之志溝洫皆載一代疏排之績非
如桑欽水經備敘川瀆原委也我

國家奠鼎燕京負崇山而襟滄海百川輻輳赴壑朝
宗其間順逆通塞動關生民利病

聖祖仁皇帝臨御六十餘載地平天成而於畿甸河道隄
防尤勤

直隸河渠志

一

睿慮

巡行指授爲斯民圖萬世之安我

皇上繼志繼功大興水利

特頒內府金錢數百萬

命賢王董其事修濬兼施節宣備至以故水潤土甘年豐

人樂同符禹績非漢唐以來塞築補苴之能事也

宜爲後世法程故於諸川之外特詳志焉

渤海 在天津縣東南一百二十里明統志東連

遼海西抵直沽按直沽卽今大沽口河流入海處

也兩岸壁陡一闕中橫土人謂之海門潮汐所至
北抵楊村南抵程官屯西過王慶坨率二百餘里
皆淡水也鹹潮抵海門而止無益入者若天設之
以限內外斯亦奇矣

海河 南北運淀河之會流也自天津東北三岔
口迄大沽口長一百二十里淤廣崖深奔流湍駛
潮汐迎之則逆行而上禹貢所謂逆河是也每伏
秋之交二運並漲淀水爭趨駢注於三岔一口而
強潮抵碣洄漩不下倒漾橫流上游隄岸田廬皆

直隸河渠志

二

受其浸所謂尾閘不暢胷腹俱病者也故欲治直
隸之水者莫如擴達海之口而欲擴達海之口者
莫如減入口之水雍正三年

上命 怡賢親王興修水利

親授方畧於南北運各建壩開河減水分流別途歸海豈
僅爲運河計哉入口之水減則達海之口寬而北
來之永定河南來之子牙河中間七十二清河乃
得綽然入三岔口而東注朱子云治水先從低處
下手正此意也

衛河 卽南運河也亦曰永濟渠亦曰御河源出河南衛輝府自山東武城縣流入直隸故城縣界又東逕山東德州界復入直隸逕景州東吳橋縣西又東北逕東光縣西又東北逕交河縣東南七里口又東北逕泊頭鎮入南皮縣界又東北逕滄州城西又東北逕青縣城東靜海縣城西天津府城北至三分口與白河會入海計長八百餘里寰宇記永濟河在清池縣西三十里自南皮縣來入乾寧軍亦呼爲御河金史地理志南皮東光吳橋

直隸河渠志

三

有永濟渠按衛河本西漢時大河所經東漢以後爲清漳二瀆所經隋時開爲永濟渠宋皇祐初合永濟渠仍爲大河所經南渡後大河南徙而衛河如故金元以來皆漕運所經也有減水河二一在滄州南十五里絕隄一在故興濟縣皆明弘治中開以備衛河泛溢久而堙塞閘石猶有存者雍正三年大水衛河溢決十三口 怡賢親王奉
上命查修水利奏開減水二河各建滾水石壩一座挑濬舊河分達海港滄青水勢藉以消洩居民賴之

按南運向苦淺滯故額設淺夫以供挑挖兩岸隄工隨時補苴而已自漳河南徙於館陶入運湍急浩瀚每羨溢爲災雍正四年經 怡賢親王奏請分道專轄增汛員設歲修始以隄防爲務乃隄日增高而水亦隨長伏秋汛漲各州縣往往於隄上加埝以防漫溢蓋以漳水泥濁河形曲折墊淤於下則泛溢於上勢固然也計惟於德州上流與古黃河相近之處建壩廣三四十丈引而注之古黃河不惟直隸河隄永免漲溢卽德州一帶工程亦

直隸河渠志

四

獲寧謐矣但地隸山東在此爲切已之憂者在彼未免爲秦越之視雍正八年七月德州第九屯隄決直隸景州以下十餘州縣禾稼盡沒水利衙門屢行咨會而決口訖未堅築蓋其地處上游水過正堪藝麥而此間形如仰釜有受無洩縱竭力修防隄工鞏固亦何救於田廬之湮沒耶若將臨清以北河道併歸直隸總河管轄則一河首尾修濬自如上下不致阻格矣

白河 卽北運河也亦曰潞河方輿紀要白河源

出宣化府龍門縣東滴水崖東流入密雲縣之石塘嶺過縣西入通州界其支流亦從石塘嶺過懷柔縣西順義縣東入通州東境合焉東南逕郭縣武清縣東而入直沽合衛河入海又白河逕靈蹟山黃花鎮川河入焉又南逕牛欄山東麓潮河流合焉又南逕順義縣東門外順義縣志白河發源塞外白石塘嶺白馬關入故曰白河赴通州北關與溫榆河合卽運糧河性悍多沙遷徙無常俗稱爲自在河明神宗實錄萬曆三十一年從工部議挑

通州至天津白河深四尺五寸所挑沙土卽築隄兩岸著爲令漕河圖志燕趙之間地方千里其間巨細河流悉至武清縣丁字沽注於白河故一遇雨潦白河滿溢要兒渡口南蔡村等處衝決隄岸壞民田廬起夫塞築勞費萬計逮時乾旱舟行又或淺阻以此知水勢盈涸不常不可以經久而論也按白河會潮沽榆沙通惠諸河之水源高勢峻有如建瓴而西北諸山泉流滙聚每伏秋之際積雨未歇怒流已至頃刻尋丈非徒恃隄防所能捍

禦也康熙三十八年決武清縣筐兒港三十九年聖祖仁皇帝親臨視閱

命員外牛鈕等於沖決處建減水石壩二十丈開挖引河夾以長隄而注之塌河淀由賈家沽道洩入海河楊村上下百餘里河平隄固有

御製碑文誌其事康熙五十年以河西務工程險要

親臨指授命牛鈕開挖引河復以河西務城東有舊河形對新河下口至三里屯長四百餘丈

特命開直河一道次年工成於是新河之溜移流於西而

東岸大隄之汕刷以免要兒渡之衝險無虞矣雍正三年大水隄岸埽壩多有衝潰四年經怡賢親王奏請北運河一切工程歸通永道統轄河西務設同知一員楊村設通判一員分界管理增置縣丞主簿等官以專防修五年河水泛溢東西岸漫決者四六年怡賢親王奏拓筐兒港舊壩濶六十丈展挖引河改築長隄七年濬賈家沽道分減既多消洩亦暢故壩門以下河水安流而河西務一帶距壩稍遠山水暴至遂復漫決上墜

聖懷發帑遊員授之方畧於河西務上流之青龍灣建壩四十丈開引河而注之七里海仍展挖寧車沽河導七里海水而洩之北塘口上下分消區畫盡善運道民生均獲寧謐而所費帑金已不下六十餘萬矣

淀河 在天津縣北五里永定子牙清河之會流也自河頭至丁字沽入北運河長四十里淀水浩淼至此始有崖岸故名河頭

東淀 延袤霸州文安大城武清東安靜海之境

直隸河渠志

七

東西亘一百六十餘里南北二三十里及六七十里不等蓋七十二清河之所匯潴也永定河自西北來子牙河自西南來咸入之

永定河 亦曰盧溝河亦曰渾河亦曰桑乾河永定之名

聖祖仁皇帝所命也明外史河渠志桑乾河發源太原之天池伏流至朔州馬邑雷山之陽有金龍池者渾泉溢出是爲桑乾東下大同古定橋抵宣府保安州雁門雪中應州諸水皆會穿西山入宛平界東

南至看丹口分爲二其一東由通州高麗莊入白河其一南流霸州合易水至天津丁字沽入漕河是河過懷來東兩山間不得肆至都城西四十里石徑山之東地平土疏衝激震蕩遷徙弗常元史名曰小黃河以其流濁也金史禮志大定十九年有司言盧溝河水勢泛溢齧民田乞官爲封冊神號特封安平侯建廟祀河渠志大定二十七年宰臣以孟家山金口間視都城高一百四十餘丈倘遇暴漲其害匪細若固塞之則所灌稻田俱爲陸地

直隸河渠志

八

種植禾麥亦非曠土上是其言遣使塞之二十九年以涉者病河流湍急詔命造舟旣而更命建石橋明昌三年三月成勅命名曰廣利卽今之盧溝橋也元史郭守敬傳至元二年授都水少監言金時自燕京之西麻峪村分盧溝一支東流穿西山而出是爲金口其水自金口以東燕京以北灌田若干頃其利不可勝計今若按視故蹟使水得流通上可以致西山之利下可以廣京師之漕又言當於金口西預開減水河西南還大河令其深廣

以防漲水突入之患帝善之明宣宗實錄戶部侍郎王佐言通州至河西務河道淺漕船動以千計兼四方商旅舟楫往來無港汊可泊張家灣西舊有渾河若加疏濬近京一二十里更使充廣猶爲巨浸令可泊船公私兩便上命都督馮斌等審視七年冬斌等以圖進上以其役重大姑止固安縣志桑乾河自盧溝下流入縣境明嘉靖初徙縣北十餘里東流至縣東紀家莊北分爲二萬厯中又徙縣西十餘里東南流逕黃堡之北而東南入霸州界尋又徙縣南大隄下後復徙北我朝順治十一年由縣西宮村與清水合流而南入新城界永清縣志明萬厯三年撫臣王一鶚修築河隄延袤五十餘里障水東流三十三年復抵縣界直逼城垣我

朝順治八年徙固安迤西幾七十里與白溝河合流霸州志明正德初在州南門外嘉靖中徙州城北後徙固安北十里鋪其支流則自半壁店李家口繞州東北境由鋪疙疸白墳採木營達信安我

朝順治中每決於固安之巨羅堡由州治西城北東入清河後更決於新城之九花臺南里諸口而州城之西南竟成巨河矣康熙戊辰仍從善來營入王帶河俗謂之霸州河按盧溝亦曰黑水河水色最濁其急如箭東決則西淤倏忽遷改前人謂之無定河自元厯明冲齧奔潰屢修屢決迄無寧歲康熙三十七年三月我

聖祖仁皇帝軫念郊圻親臨視閱命撫臣于成龍大築隄堰疏濬兼施自宛平之盧溝橋至永清之朱家莊滙狼城河注西沽以達於海延袤二百餘里廣十五丈五月工告成

賜名永定河

勅建河神廟

御製碑文以記之自是湍水軌道橫流以寧三十年來河無遷徙此從古所未有也惟是下流入淀之後水渾泥停積漸闌淤蒙

聖祖諭旨屢下毋令壅礙清流而該管分司衙門惟事修防不加疏導淤而南信安勝芳等淀變爲高原復

淤而北策城新張諸泊墊爲平陸駸駸乎及於台頭與子牙河會壅閼清流幾無達津之路矣雍正三年 怡賢親王奉

命查修水利

上諭令引渾河別由一道入海毋使令入淀大哉

王言已攬河道全局而居其要矣蓋淀泊之用有翕受之功亦有停蓄之利衆流競趨滙爲巨澤容與蕩漾有以緩其奔突之勢然後安流弭節而去則其衝易受而其患易禦正定順德廣平之有南北二泊

直隸河渠志

七

猶順天保定河間之有東西二淀皆天地造設自然之妙納衆流而節宣之不使之一往衝突而不可禦也西淀之水會爲一河分爲三汊而滙於東淀南泊之水注於北泊北泊之水出滏陽之道合滹沱之流亦由子牙一河歸於東淀則東淀一區所以蓄直隸全局之水游行而節宣之乃永定濁流闌淤梗噎於其間則上游之氾濫者將安歸乎 怡賢親王欽遵

諭旨於郭家務改河東行復開下流之長洵河引逕三角

淀而注之河頭與清河會周築三角淀圍隄以防其北軼又以河性善淤奏明逐年挖淺俾河流不致遷徙籌畫可謂盡善而河官錮習不利於挖淺而利於築隄改河之後隄日增高而河亦與之俱長長洵河淤塞絕流三角淀所餘無幾於是散漫南行頭道河二道河皆成斷港剩有楊家一河若經汛之後再淤而南則清水無路歸津側注於楊柳青一帶而濁流復從而迸注之其不至穿運而過者幾希此目前之大患全局之深病也爲今之

直隸河渠志

三

計惟疏挖長洵導之東注河頭南岸接築長隄至楊家河而止雖不能必其不再淤而旋淤旋挖是亦可暫爲補救矣

按永定濁泥善肥苗稼凡所淤處變瘠爲沃其收數倍涇水之富關中漳水之富鄴下不是過也河所經由兩岸窪鹹之地甚多若相其高下開濬長渠如懷來保安石徑山引灌之法分道澆溉則斥鹵變爲肥饒而分水之道旣多則奔騰之勢自減從高而下自近而遠一河之潤可及十餘州縣此

亦轉害爲利之一奇也惟在任事者不避勞怨持議者不惑浮言則鄭國史起之功安在不復見於今日乎

清河 卽淀池之經流也其派有三分自會同河之三汊口逕合山而北出紀家淀而東入勝滂河者此西派也由趙家房逕托蓮泊出郭家窪會勝滂河者此東派也由下馬頭逕崔家房入張家嘴過任家莊逕左家莊泊歸石溝河者此南派也沿大隄而東逕西馬頭堂頭左家莊會石溝河則其

直隸河渠志

三

支流也勝滂石溝二河總歸臺頭一河經羊芬港而出楊家河楊家河至三汊口計長一百四十里自永定下流入淀勝滂河淤而東西二派無下口張家嘴淤而南派無正流惟沿隄一支寬不過二三丈深不過五六尺何以容西來決潏無涯之巨浸乎雍正三年自崔家房以東決隄九處各數十丈文安城郭宛在水中 怡賢親王奉

命查修水利開勝滂河十七里而東西二派下口遂遙挖張家嘴河五里而沿隄一支分流北注又於上流

疏濬中亭河四十餘里自口頭對岸之下河門分引玉帶河水入臺山河其下流石溝臺頭淤淺之處槩行撈挖數載以來清流湍駛隄防晏如霸保丈大之間禾黍豐而稭稻熟民享樂利皆

聖主勤恤之德 賢王治淀之功也

按以上諸河經由泊港菰蘆叢生芰草密布壅溜停沍易致淤淺淺阻之後舟楫不行復成斷塞雖分隸河道統轄而該管汛員惟知保守隄工至於淀之通塞河之淤暢俱在茫茫積浸中爲考成所

直隸河渠志

古

不及誰復過而問之殊不知淀河一塞分消無路西來之水并注隄下一遇積雨暴漲頃刻尋丈雖有人力將安所施故防隄而不濬河非計也今中亭河苦淺趙家房河苦淤張家嘴未達於淀泊沿隄一河自堂頭以下至壩嘴頭亦苦淺石溝通勝滂一河苦隘勝滂至臺頭一河苦淺計其丈里非水涸時與大工隨宜疏濬不可

會同河 一統志在霸州南十三里又名苑口河本玉帶河也自保定縣流入州界又東北曲折行

可十里爲善來營北岸有渾河口又東可五里爲苑家口又東五里爲蘇家橋河流至此分爲三道卽所謂三汊口也冊說玉帶河至本州境會渾河東下名會同河分二支俱流經文安縣境散入石城等淀本河正派至州東無梁閣名邊家河又分一支入永清縣界名信安河其正流曲折而東入文爾諸淀又東逕東安縣界爲呂公河按會同爲玉帶之下流出自西淀之茅兒灣至霸州而拒馬桑乾胡良霸水皆會焉故名會同河今諸河俱已

直隸河渠志

五

改流惟栲栳圈一河南北相望卽中亭河也首尾皆淤斷而會同河身寬不逾二十丈或十五六丈總會順天保定正定三府西山一帶三十餘河之水勢不能容則蕩擊爲暴決何家道口決鹿瞳決下武各莊決保定縣幾無虛歲雍正五年中亭河開通分流北去玉帶之水十減二三但河身本淺於正流而新開之牯牛河自西栲栳圈會入挾擁泥沙復加闢淤則浚治之工有不可一日緩者其會同下流之信安河已成陸地卽勝勞至辛張逕

褚沽東沽二港達王慶坨一支名呂公河者亦無河形惟餘臺頭一派爲正流則上自石溝下至楊家河通塞淤暢所關最鉅此河道全局之利害也中亭河亦名新挑河一統志在霸州南八里綿亘數十里按此卽古中亭河也亦曰栲栳圈河康熙三十八年

聖祖命河臣王新命開挑上接十望河下入臺山河分減玉帶河水勢發帑築隄上下各六工上六工距河稍遠以護州治下六工縷河爲隄以護田廬增設

直隸河渠志

六

州判一員管理每歲按里出夫隨時修補後渾河淤至勝勞下流遂塞而十望河自張青口來者爲白溝流沙墊淤上流亦斷自是隄工殘廢而下六工無復遺址與積淀相連雍正三年怡賢親王奏開中亭十望二河四年中亭河工竣十望河以積水未開五年大水難以興工遂罷十望之役自口頭對岸之下河門挑引河一道分玉帶河水而注之中亭河增設吏目一員分汛防修七年州判陳起唐捐貲修築下六工隄長四十里

西淀 跨雄新數邑之境既廣且深西北諸山之
水皆匯焉北自雄縣來者曰白溝河拒馬之下流
也拒馬發源易州廣昌之涑山至房山鐵鎖崖分
爲二派一派東入涿州過新城而南挾河琉璃河
廣陽鹽溝諸水白玉塘西域寺甘池諸泉皆入之
一派南入涑水經定興而東易州之濡水武水白
楊虎眼梁村馬跑諸泉及道欄河女思澗子莊溪
諸水俱來會之二派合流爲白溝河入柴伙淀西
自安州來者曰依城河曹河徐河一畝雞距方順

直隸河渠志

七

龍泉諸水之所會也徐水出五迴嶺經滿城至安
肅而曹水會焉一畝泉出滿城東南餘小泉以百
數雞距紅花名最著流經清苑城南至糧河橋而
方順水來會之方順卽曲逆河祁水之下流也五
雲石曰二泉流爲放水河五郎河入焉流逕石橋
村至糧河橋與一畝泉河會流逕新橋而滿城之
龍泉河自南來入之至善馬廟與徐河合流爲依
城河入雜淀西北自安肅來者曰雹河源出石獸
崗灌河入之由新安之黑龍口歸雜淀新安三面

皆水惟城北爲乾土而地處容城下流雨潦南下
則大殷淀一帶盡爲鄰壑墟里蕭條最稱貧瘠雍正三年 怡賢親王奏請於三台村開引雹河逕
小王營尙村之北至南河頭入燒車淀南岸築隄
建閘以裨節宣隄內大殷淀數百頃皆引流種稻
屢獲豐收澤國已成樂土矣南自高陽來者曰豬
龍河唐沙滋三水之所會也唐河原名澹水源自
山西靈邱入唐縣爲唐河恒水自西北來會居民
引以溉稻直達下素町畦相望經曲陽之鎮里高

直隸河渠志

八

門所溉尤多南入定州而白龍泉復來會之王謙
王釋等村傍河皆圩岸也沙河來自山西之繁峙
入曲陽界合平陽河南流阜平之營城臙脂二河
行唐之郃河咸會焉其上流亦名派水經新樂歷
定州沿流多資灌慨滋河發源山西之枚回山經
靈壽爲慈水七祖寨全頭大明川壅流可田人行
唐之張茂村伏焉至無極南孟社而復出遶縣北
旋經深澤之龍泉固沃仁橋疏流成渠皆天然水
利也三水頗稱鉅流畢會於祁州之三岔口爲豬

龍河逕博野蠡縣高陽而入白洋淀豬龍河水性
湍急奔騰最難捍禦雍正三年決柴淀口而東潰
蠡蚰口古隄直衝鄭州驛路十里浸爲巨澤 怡
賢親王親歷相度疏通豬龍故道決口始塞驛路
復通然下流歸淀之處河道紆迴停沙壅溜易致
橫決復令清河道王紘於出岸村開挖引河十里
至孟仲峯出口東岸築二壩以防其軼西岸截沙
嘴以順其流然後安流入淀又於放水口斜築長
隄以禦倒漾蠡蚰口殘隄數十里亦一例加修以

直隸河渠志

亢

爲重障於是豬龍順軌瀕河田疇比年豐稔但自
邢州以下岸土挾沙最易坍塌岸圯則隄無所附
宜於頂溜掃灣建築挑水迎水等壩護岸以固隄
根其下口歸淀之處近有淤沙漲起抵閘河流亦
宜開挖以順水勢

趙北口 居西淀之中舊有石橋八座白洋諸淀
之水皆由橋下東流實西淀之咽喉也而石橋卑
隘礙流雍正三年 怡賢親王奏請易之以木升
高加濶又增建三橋俾積淀之水暢然東注但白

溝濁水自北而下出河門而橫截清流至藥王行
宮前河形拗折土人謂之驚頸所謂咽喉已通而
胃膈未利也雍正四年委員挑挖經汛而其淤如
故蓋白溝漲時近自諸山而下推擁泥沙所至填
淤四十里之柴伙淀變爲桑田者什三四矣不加
浚治則西來諸水泛溢無歸若歲歲撈挖是勞費
無已時也渾流入淀其害往往而然欲爲一勞永
逸之計必不使之入淀而後可查白溝故道行於
淀外自龍灣而東逕道務馬務頭洪城出張青口

直隸河渠志

平

河形宛然宜疏濬深通導白溝之流復於故道塞
其入淀之口然後將河門淺阻驚頸拗折之處盡
行挑挖如此則清濁分流淀清而河亦暢矣

子牙河 在大城縣東亦名沿河大城縣志沿河
自河間縣之龍華橋轉入縣西南二十五里之馬
村東北流逕十里灣自南而東逕白洋淀四呈口
至縣東二十五里滙黑龍港河亦名交河從而北
折繞縣東十二里趙扶村又北逕子牙村故名子
牙河亦名鹽河冊說鹽河在縣南十里自河間流

入分二支一西北流入文安縣石城淀一北流又分三支西一支入文安縣母淀東一支入大小窩口中一支入霸州文爾淀匯於武清縣三角淀入白河按子牙河總會南北二泊溢諸水終以滹沱爲經流其湍悍迅激渾濁衝墊性與餘河異水經所云右出爲澱北爲澱口者是也伏秋汛發奔騰湧溢河間以北靜海以南皆被其害康熙三十九年

聖祖仁皇帝親閱河工

直隸河渠志

三

特授方畧

頒發帑金於獻縣河間東西兩岸高築長隄西接大城東接青縣靜海各二百餘里又於廣福樓之焦家口開新河一道東北至賈口入淀特設分司一員董其事令河間府同知分轄增置縣丞主簿等官專汛防修自是河大青靜之民始有寧宇矣嗣後雍正三年分司不得其人河員怠於其職隄多潰決怡賢親王奏准動帑修築又奏請撤回分司歸天津河道統轄

按子牙河至王家口入淀之處分爲二派一派西流逕文安土橋村至趙家莊又分二支西支抵文安大隄而北至龍塘灣北支逕三灘里至張官營抵石溝河往往橫截清流兼爲隄防害一派東北流逕瓦子頭斷隄村岳莊莊頭村過王家泊抵台頭會清河而東雍正三年經怡賢親王奏請障其西流約束歸一四年令清河道王紘相度工費及汛水過後西支自淤正流俱由瓦子頭一支而莊頭村南舊有私河一道東由陳家泊歸獨流大

直隸河渠志

三

坑急溜衝刷遂通舟楫此亦水自遂其東下之性非人力所爲然順而導之再加疏濬俾全河之勢盡歸大坑則台頭一河無復渾濁之擾清水可以暢流矣再子牙河新河入淀之處東西相距二十餘里兩河之隄南連而北缺兩隄之間村落數十地皆肥美但北面無隄每遇二河漲溢淀水倒漾則數十村落皆在水中而河員猶守兩隄惟謹幸獲無虞則自以爲功此如防盜者守墻垣而開後戶盜入牖篋發匱而去垣墻守者猶巡警徹夜此

何爲者也故北面之隄斷宜接築查王家口村南東岸有古河一道名三家淀河緣東隄出瓦子頭橋下迤邐東北與新河合而入淀雖已淤淺河形宛然若挑挖深通亦可分正流之漲挑河之土卽用以築隄補缺成圍圍內之地分別高下疏列溝塍於西南建閘引溉東北洩而出之一舉而河隄兩成營田亦就矣再查新河形勢由西南而趨東北從高就下直注獨流大坑甚爲徑捷但河身淺狹隄岸殘缺若深濬而堅築之於焦家口分流之

直隸河渠志

三

處建挑水壩逼子牙之溜移入新河刮刷愈深則王家口以上無羨溢之虞卽台頭一帶亦免墊淤之患矣

千里長隄 起清苑縣界訖獻縣之臧家橋週迴於順天保定河間三府之境長千有餘里沿河繞淀爲數十州縣生民之保障康熙三十五年大水多漫決圯頽我

聖祖軫念郊圻頒發帑金

命河臣王新命徧行查勘一例加修增設縣丞主簿等官

管理隄固河平民享樂利者二十餘載雍正三年大水漫決尤甚存者亦大半殘缺四年

上命

怡賢親王委員領帑畫地修築加厚增高統於是秋告竣奏隸河道統轄董理責成工程日以堅固迄今六載高下豐稔潞河近淀州縣井閭皆歌樂土焉

滹沱河 源出山西代州繁峙縣太戲山流經太原孟縣北始入直隸平山縣北又東逕靈壽縣南入正定縣界周禮職方氏并州川滹池戰國策趙

直隸河渠志

書

攻中山以擅滹沱漢書郡國志蒲吾註永平十年作常山滹沱河蒲吾渠通漕隋圖經魏改爲清寧河唐書五行志永淳二年八月恒州滹沱河及山水暴溢害稼開成元年七月鎮州滹沱河溢害稼隄防考宋天聖間曹馬口隄壞尋後修築金史河渠志滹沱河大定八年犯正定命發民夫繕完隄岸元史河渠志延祐七年正定路言正定縣滹沱河北決隄寢近城每歲修築聞其原本微與冶河不相通後二水合其勢遂猛惟闢冶河自作一流

滹沱水十退三四正定府志明成化八年由正定出晉
州紫城口南入寧晉泊正德十三年紫城口淤塞淺漫
分爲二股一股仍由寧晉泊一股東溢由東鹿鴉兒河
入深州界遣夫於滹槃集迤東修築隄岸障東溢之水
歸寧晉故道工甫畢而秋水漲將南流仍併東行入東
鹿界嘉靖十一年遣太僕卿何棟相視回奏晉州地形
西高東下水性就下遂失故道議於藁城張村起至晉
州故壩止厚築長隄障歸故道不果其後迤州南關外我
朝順治十三年又南徙由藁城南彭村逕晉州周頭

直隸河渠志

五

村北釣魚臺龐家莊胡士莊寨入東鹿百尺口橋
至冀州歸清水河並行按滹沱水急流濁所至填
淤自入寧晉泊溢豐水道俱受其壅塞雍正三年
東徙決周頭村直衝東鹿環城而流瀾漫四野四
年 怡賢親王奉

命查勘東邑官民籲請障歸故道仍入寧晉泊 賢王以
泊乃三郡河流匯歸之地有翕受節宣之功豈可
復聽濁流淤塞致衆水無歸漲溢爲害乃親行相
度得舊河一道由木邱南至焦岡入滏河委員自

第四溝開挖一路疏濬深通於周頭築壩障其東
下而導之南流自是東深無衝潰之虞泊水免淤
塞之患矣

按滹沱之在山西本非巨川至平山合冶河而始
大冶河一名甘陶河源自山西平定州之崧嶺流
至平山初不與滹水相通元初鑿而合之其勢遂
猛延祐間引關冶河害已減半後冶河下流漸塞
復入滹沱歲有潰決之患皇慶中議復之而未果
怡賢親王於敬陳畿輔西南水利情形疏內奏請

直隸河渠志

美

塞冶河入滹之路循其故流加以挖濬引入浹河
誠爲一勞永逸之計

滏陽河 亦名滏水源出磁州神廟山東北流經
邯鄲縣東三里會清沁二水冊說渚河又名塔水
在邯鄲縣南五里發源紫山逕城西南入滏陽河
沁河在邯鄲西一里發源紫山逕城西入滏陽河
寰宇記滏陽縣滏水源出縣西北鼓山南巖下泉
源奮涌若釜之揚湯故以滏口名之其水冬溫夏
冷元史郭守敬傳守敬面陳水利四事其四磁州

東北滏漳二水合流處引水由滏陽邯鄲洺州永年下經雞澤合入漣河可灌田三千餘頃明外史河渠志滏陽河舊在任縣新店村東北源出磁州逕永年曲周平鄉至穆家口會百泉等河北流明永樂間漳河決而與合二水每並爲患至景泰間又合漳衝曲周諸縣沿河之地皆築隄備之成化間舊河淤衝新店西南爲新河合沙洛等河入穆家口亦築隄備之一統志舊滏河在雞澤縣西自永年通水開北流經此又北達平鄉縣入寧晉泊

直隸河渠志

毛

舊道紆曲不能容常潰決爲民患我

朝康熙七年知縣姜熙挑濬新河以導其流自馮鄭村至亭自頭長二里許六方等村永無水害按滏陽河舊合滏故多衝溢今漳水東徙經魏縣元城抵館陶入衛不與滏合滏水獨行貫寧晉泊而出至衡水縣界滏汴河出焦岡合流逕冀州武強獻縣河間青縣大城入淀名子牙河其支流自完固口逕杜林鎮抵青縣之鮑家嘴入南運河近已淤淺惟子牙一支爲巨津焉自寧晉泊以上滏水

所經州縣多引流種稻沿河開墾甚多而磁州之民欲專水利以致下流稻田多廢爭訟累歲不休雍正四年 怡賢親王奏稱查廣平府舊志磁州屬廣平路領成安今成安現隸廣平則磁州本非豫屬明矣請將磁州改歸廣平府則滏陽一河全由直隸統轄均水息爭同安樂利矣奉

旨怡親王奏請將磁州改歸廣平府管轄以收滏陽水利稽考誌書相度地勢援古證今俱爲符協似於廣郡一帶民田大有裨益着九卿會議具奏嗣經戶部議覆應

直隸河渠志

天

如所請行自是廣平以下均沾河潤各州縣營田多至二千餘頃從前斥鹵盡爲稻鄉矣

按滏河隄岸例係潁河村莊修築工多力寡難免潰決應照千里長隄之例將該州縣所有隄工丈尺查明按通邑里甲攤派均修造冊存案永著爲令工少人多自成鞏固矣出泊以下水勢倍增會以滏汴湍悍之流所有民堰難資捍禦雍正八年衡水隄決溢流直犯青縣可爲寒心應將戚家橋以上直至衡冀一帶民堰令地方官查估動帑增